

**O‘ZBEKISTON RESPUBLIKASI VAZIRLAR MAHKAMASINING
QARORI**

**O‘ZBEKISTON RESPUBLIKASI HUKUMATINING AYRIM QARORLARIGA
RESPUBLIKA OLIY TA’LIM MUASSASALARINING IQTIDORLI TALABA-
YOSHLARINI HAR TOMONLAMA QO‘LLAB-QUVVATLASH VA
RAG‘BATLANTIRISH TIZIMINI YANADA TAKOMILLASHTIRISHGA QARATILGAN
O‘ZGARTIRISH VA QO‘SHIMCHALAR KIRITISH TO‘G‘RISIDA**

O‘zbekiston Respublikasi Prezidentining “Respublika oliy ta’lim muassasalarida tahsil olayotgan, ilmiy-tadqiqot faoliyati bilan shug‘ullanayotgan iqtidorli yoshlarni yanada qo‘llab-quvvatlash to‘g‘risida” 2021-yil 9-sentabrdagi PF-6309-son **Farmonida** belgilangan vazifalar ijrosini ta’minlash hamda respublika oliy ta’lim muassasalarining iqtidorli talaba-yoshlarini har tomonlama qo‘llab-quvvatlash va rag‘batlantirish tizimini yanada takomillashtirish maqsadida Vazirlar Mahkamasi qaror qiladi:

1. O‘zbekiston Respublikasi Hukumatining **ilovaga** muvofiq ayrim qarorlariga o‘zgartirish va qo‘shimchalar kiritilsin.

2. O‘zbekiston Respublikasi Oliy va o‘rta maxsus ta’lim vazirligi manfaatdor vazirlik va idoralar bilan birgalikda o‘zlari qabul qilgan normativ-huquqiy hujjatlarni bir oy muddatda ushbu qarorga muvofiqlashtirsin.

3. Mazkur qarorning bajarilishini nazorat qilish O‘zbekiston Respublikasi Bosh vazirining ijtimoiy rivojlantirish masalalari bo‘yicha o‘rinbosari B.A. Musayev hamda O‘zbekiston Respublikasi oliy va o‘rta maxsus ta’lim vaziri A.X. Toshkulov zimmasiga yuklansin.

O‘zbekiston Respublikasining Bosh vaziri A. ARIPOV

Toshkent sh.,
2021-yil 4-noyabr,
674-son

Vazirlar Mahkamasining 2021-yil 4-noyabrdagi 674-son qaroriga
ILOVA

**O‘zbekiston Respublikasi Hukumatining ayrim qarorlariga kiritilayotgan o‘zgartirish va
qo‘shimchalar**

1. Vazirlar Mahkamasining “O‘zbekiston iqtidorli yoshlarini taqdirlash va moddiy rag‘batlantirish to‘g‘risida” 2008-yil 13-oktabrdagi 226-son **qarorida** (O‘zbekiston Respublikasi QT, 2008-y., 10-son, 55-modda):

a) **1-band** quyidagi tahrirda bayon etilsin:

“1. Quyidagilar:

Tayanch doktoranturada tahsil olayotgan doktorantlar uchun O‘zbekiston Respublikasi Prezidentining davlat stipendiyalari va ularni tayinlash tartibi to‘g‘risidagi nizom 1-ilovaga muvofiq;

Magistratura bosqichi talabalari uchun O‘zbekiston Respublikasi Prezidentining davlat stipendiyalari va ularni tayinlash tartibi to‘g‘risidagi nizom 2-ilovaga muvofiq;

Bakalavriyat bosqichi talabalari uchun O‘zbekiston Respublikasi Prezidenti va nomli davlat stipendiyalari hamda ularni tayinlash tartibi to‘g‘risidagi nizom 3-ilovaga muvofiq;

Respublika olimpiadalari, tanlovlari va sport musobaqalarini o‘tkazish to‘g‘risidagi nizom 4-ilovaga muvofiq;

Xalqaro va respublika olimpiadalari, tanlovlari, musobaqalari g‘oliblari bo‘lgan akademik litseylar, professional ta’lim muassasalari va umumta’lim maktablari o‘quvchilarini taqdirlash tartibi to‘g‘risidagi nizom 5-ilovaga muvofiq tasdiqlansin”;

b) **1-ilovada:**

nomi “Tayanch” soʻzidan keyin “doktoranturada tahsil olayotgan” soʻzlari bilan toʻldirilsin;

1 va 2-bandlar quyidagi tahrirda bayon etilsin:

“1. Oʻzbekiston Respublikasi Prezidentining davlat stipendiyalari davlat oliy taʼlim muassasalari va ilmiy-tadqiqot institutlarining soʻnggi oʻquv yilida tayanch doktoranturada tahsil olayotgan doktorantlarga (keyingi oʻrinlarda — tayanch doktorantlar deb yuritiladi) — Oʻzbekiston Respublikasi fuqarolariga Oʻzbekiston Respublikasi Oliy va oʻrta maxsus taʼlim vazirligi tomonidan oʻtkaziladigan tanlov asosida tanlab olish natijalariga koʻra tayinlanadi.

2. Tayanch doktorantlarga tayinlash uchun belgilangan Oʻzbekiston Respublikasi Prezidentining davlat stipendiyalari kvotasi (oʻnta) Oliy malakali ilmiy va ilmiy-pedagog kadrlar ixtisosliklari roʻyxatiga muvofiq har yili Oʻzbekiston Respublikasi Oliy va oʻrta maxsus taʼlim vazirligi tomonidan tasdiqlanadigan tanlov yoʻnalishlari boʻyicha (har bir tanlov yoʻnalishiga bittadan stipendiya hisobidan) taqsimlanadi”;

v) 2-ilovada:

nomidagi “Talabalar” soʻzi “Magistratura bosqichi talabalar” soʻzlari bilan almashtirilsin;

1 va 2-bandlar quyidagi tahrirda bayon etilsin:

“1. Magistratura bosqichi talabalar uchun Oʻzbekiston Respublikasi Prezidentining davlat stipendiyalari Oʻzbekiston Respublikasi fuqarolari boʻlgan davlat oliy taʼlim muassasalari talabalariga Oʻzbekiston Respublikasi Oliy va oʻrta maxsus taʼlim vazirligi tomonidan oʻtkaziladigan tanlov natijalariga binoan tayinlanadi.

2. Talabalarga tayinlash uchun belgilangan Oʻzbekiston Respublikasi Prezidentining davlat stipendiyasi kvotasi (yigirma ikkita) Oliy taʼlim yoʻnalishlari va mutaxassisliklari klassifikatoriga muvofiq har yili Oʻzbekiston Respublikasi Oliy va oʻrta maxsus taʼlim vazirligi tomonidan tasdiqlanadigan tanlov yoʻnalishlari boʻyicha (har bir tanlov yoʻnalishiga bittadan stipendiya hisobidan) taqsimlanadi.

Bunda, oliy taʼlim muassasalari tomonidan nomzodlar har bir tanlov yoʻnalishi boʻyicha bittadan tavsiya etilishi mumkin”;

3-banddan “bakalavriatdagi taʼlim yoʻnalishi yoki” soʻzlari chiqarib tashlansin;

8-banddan toʻrtinchi xatboshi chiqarib tashlansin;

12-band quyidagi tahrirda bayon etilsin:

“12. Oʻzbekiston Respublikasi Prezidentining davlat stipendiyalari sohiblari boʻlgan magistratura bosqichi talabalar oliy taʼlim muassasasini bitirgach, ikki yil davomida tayanch doktoranturaga kirish imtihonlarisiz Oʻzbekiston Respublikasi Davlat budjeti mablagʻlari hisobiga qabul qilinadi”;

13-band oʻz kuchini yoʻqotgan deb hisoblansin;

g) 3-ilovaning matni quyidagi tahrirda bayon etilsin:

“Bakalavriat bosqichi talabalar uchun Oʻzbekiston Respublikasi Prezidenti va nomli davlat stipendiyalari hamda ularni tayinlash tartibi toʻgʻrisida

NIZOM

1-bob. Umumiy qoidalar

1. Mazkur Nizom oliy taʼlim muassasalarining bakalavriat taʼlim yoʻnalishlari talabalar uchun Oʻzbekiston Respublikasi Prezidenti va nomli davlat stipendiyalarini tayinlash tartibini belgilaydi.

Ushbu Nizom Kamoliddin Behzod nomidagi davlat stipendiyasini tayinlash tartibiga nisbatan tatbiq etilmaydi.

2. Oliy taʼlim muassasalari bakalavriat bosqichi talabalar uchun Oʻzbekiston Respublikasi Prezidentining davlat stipendiyalari Oʻzbekiston Respublikasidagi davlat, nodavlat va xorijiy oliy taʼlim muassasalari, shu jumladan, qoʻshma taʼlim dasturlarida butun oʻqishi davomida faqat aʼlo baholarga oʻqiyotgan Oʻzbekiston Respublikasi fuqarosi boʻlgan oxirgi kurs talabalariga tayinlanadi va toʻlanadi.

O‘zbekiston Respublikasi Prezidenti davlat stipendiyalari har bir oliy ta‘lim muassasasining bakalavriat bosqichidagi bir nafar bitiruvchi kurs talabasiga tayinlanadi va to‘lanadi.

Beruniy, Ibn Sino, Navoiy, Ulug‘bek, Imom al-Buxoriy va Islom Karimov nomli davlat stipendiyalari (keyingi o‘rinlarda — nomli davlat stipendiyalari) O‘zbekiston Respublikasidagi davlat va xorijiy oliy ta‘lim muassasalari, shu jumladan, qo‘shma ta‘lim dasturlarining oxirgi ikki kursida o‘qiyotgan talabalarga tayinlanadi va to‘lanadi.

To‘lepbergen Qaipbergenov va Ibroyim Yusupov nomli davlat stipendiyalari Qoraqalpog‘iston Respublikasidagi davlat, nodavlat va xorijiy oliy ta‘lim muassasalari, shu jumladan, qo‘shma ta‘lim dasturlarining oxirgi ikki kursida o‘qiyotgan talabalarga tayinlanadi va to‘lanadi. Bunda, ushbu nomli davlat stipendiyalari soni Qoraqalpog‘iston Respublikasidagi har bir oliy ta‘lim muassasasi uchun To‘lepbergen Qaipbergenov va Ibroyim Yusupov nomli davlat stipendiyalari bo‘yicha alohida bittadan belgilanadi.

3. Kelgusi o‘quv yili uchun nomli davlat stipendiyalari soni joriy o‘quv yili oxirida O‘zbekiston Respublikasi Oliy va o‘rta maxsus ta‘lim vazirligi taqdimnomasiga binoan Vazirlar Mahkamasi tomonidan belgilanadi.

Bunda, O‘zbekiston Respublikasidagi davlat, nodavlat va xorijiy oliy ta‘lim muassasalari hamda ularning filiallari bo‘yicha davlat stipendiyalari soni O‘zbekiston Respublikasi Oliy va o‘rta maxsus ta‘lim vazirligi tomonidan Oliy ta‘lim yo‘nalishlari va mutaxassisliklari klassifikatoriga muvofiq har yili tasdiqlanadigan tanlov yo‘nalishlari va talabalar sonidan kelib chiqib taqsimlanadi.

4. O‘zbekiston Respublikasi Prezidenti va nomli davlat stipendiyalari tanlovlarida ishtirok etuvchi nomzodlarga quyidagi talablar belgilanadi:

a) nomli davlat stipendiyalari uchun:

a‘lo o‘qish va ilmiy (ijodiy) ishlarda ishtirok etish;

yo‘nalishlar bo‘yicha konferensiya (tanlov)larda qatnashish;

O‘zbekiston tarixini bilish;

tillarni — davlat tilini va bitta xorijiy (Mustaqil Davlatlar Hamdo‘stligi mamlakatlari davlat tillaridan tashqari) tilni bilish, bakalavriatdagi ta‘lim yo‘nalishi xorijiy til hisoblangan alohida hollarda qo‘shimcha ravishda yana bitta xorijiy tilni bilish. Bunda, talabgorlar ushbu tillar bo‘yicha o‘z bilimlari darajasini aniqlash uchun o‘qish joyidagi til kafedralarida maxsus suhbatdan o‘tadilar;

b) O‘zbekiston Respublikasi Prezidenti davlat stipendiyasi uchun mazkur bandning “a” kichik bandida belgilangan talablarga qo‘shimcha ravishda o‘qiyotgan bakalavriat ta‘lim yo‘nalishiga mos mavzuda kamida ikkita e‘lon qilingan ishlar (maqola, tezis yoki asarlar)ning mavjudligi talab etiladi.

2-bob. Tanlovlarni o‘tkazish

5. O‘zbekiston Respublikasi Prezidenti va nomli davlat stipendiyalarini tayinlash uchun nomzodlarni ko‘rsatish oliy ta‘lim muassasalari kengashlari tomonidan, talabgorlarning o‘quv va ilmiy faoliyatini ommaviy muhokama qilish asosida amalga oshiriladi.

O‘zbekiston Respublikasi Prezidenti va nomli davlat stipendiyalariga talabgorlar dastlabki ko‘rib chiqish uchun oliy ta‘lim muassasasi kengashiga quyidagilarni taqdim qiladilar:

sinov daftarchasidan ko‘chirma;

dekanat va kafedraning tavsiyanomasi;

ilmiy (ijodiy) ish rahbarining tavsiyanomasi;

ilmiy ishlar ro‘yxati va ularning bosma nusxalari;

tillar kafedrası, tarix kafedrasining suhbat natijalari haqidagi ma‘lumotnomalari.

Barcha hujjatlar jildga (papkaga) joylangan holda taqdim etiladi. Muqovada O‘zbekiston Respublikasi Prezidenti yoki nomli davlat stipendiyasi nomi, talabgorning familiyasi, ismi va otasining ismi, fakulteti, bakalavriat ta‘lim yo‘nalishi, kursi, guruhi ko‘rsatiladi.

6. Oliy ta‘lim muassasalari kengashlari talabgorlarni tanlovlarning navbatdagi bosqichiga tavsiya etish bo‘yicha yashirin ovoz berish orqali oddiy ko‘pchilik ovoz bilan qaror qabul qiladilar.

Ovoz berish jarayonida oliy ta'lim muassasasining professor-o'qituvchilari va talabalari ham ishtirok etishi mumkin.

Ovoz berish natijalariga ko'ra oliy ta'lim muassasasi kengashi tomonidan:

O'zbekiston Respublikasi Prezidenti davlat stipendiyasiga eng ko'p ovoz olgan uch nafardan (bunda nomzodlar turli tanlov yo'nalishlari bo'yicha aniqlanishiga urg'u beriladi);

nomli davlat stipendiyalariga ajratilgan har bir kvotaga eng ko'p ovoz olgan uch nafargacha nomzod tanlovning navbatdagi bosqichiga tavsiya etiladi.

7. Oliy ta'lim muassasasi kengashi qaroriga asosan tanlovlarning navbatdagi bosqichiga tavsiya etilgan nomzodlar to'g'risidagi ma'lumotlar va tegishli hujjatlar oliy ta'lim muassasasining mas'ul xodimi tomonidan Oliy va o'rta maxsus ta'lim vazirligining "stipendiya.edu.uz" elektron tizimiga har yili 1 — 15-avgust kunlari kiritiladi.

Bunda, nomzodlarning hujjatlarining asliga to'g'ri ekanligi hamda "stipendiya.edu.uz" elektron tizimiga o'z vaqtida va to'g'ri kiritilishi bo'yicha mas'uliyat oliy ta'lim muassasasi rektori (direktori) zimmasiga yuklatiladi.

8. O'zbekiston Respublikasi Oliy va o'rta maxsus ta'lim vazirligi stipendiyalar tayinlash haqidagi tavsiyanomalarni yiliga bir marta, har yili 10 — 30-sentabr kunlari ko'rib chiqadi.

9. O'zbekiston Respublikasi Prezidentining davlat stipendiyasiga talabgorlar chet tillari, axborot texnologiyalari, O'zbekiston tarixi fanlari bo'yicha bilim darajasini aniqlash uchun O'zbekiston Respublikasi Vazirlar Mahkamasi huzuridagi Davlat test markazida (hududlar bo'yicha) maxsus test sinovlari topshiradilar. Davlat test markazi test sinovlari natijalari qaydnomalarini Oliy va o'rta maxsus ta'lim vazirligiga taqdim etadi.

10. O'zbekiston Respublikasi Prezidenti va nomli davlat stipendiyalari sovrindorlari talabgorlarning ilmiy ishlari, erishgan yutuqlari hamda o'tkazilgan test sinovlari natijalariga ko'ra Oliy va o'rta maxsus ta'lim vazirligida tanlov yo'nalishlari bo'yicha tashkil etilgan tanlov komissiyalari qaroriga asosan aniqlanadi.

11. Tanlov komissiyalarining qabul qilingan qarorlariga asosan, O'zbekiston Respublikasi Prezidenti va nomli davlat stipendiyalari sovrindori bo'lgan talabalar ro'yxati O'zbekiston Respublikasi oliy va o'rta maxsus ta'lim vazirining buyrug'i bilan tasdiqlanadi.

3-bob. Stipendiyalarni tayinlash va ularga beriladigan imtiyozlar

12. O'zbekiston Respublikasi oliy va o'rta maxsus ta'lim vazirining buyrug'i oliy ta'lim muassasasi rektori (direktori, ijrochi direktori)ning talabalarga O'zbekiston Respublikasi Prezidenti va nomli davlat stipendiyalarini tayinlash va to'lash haqidagi buyruqlarni rasmiylashtirishi uchun asos hisoblanadi.

Stipendiyalar 1-sentabrdan boshlab, bir yil muddatga, belgilangan miqdorga qat'iy rioya qilgan holda tayinlanadi.

13. O'zbekiston Respublikasi Prezidenti va nomli davlat stipendiyalari tanlovlarida g'olib bo'lgan talabalarga O'zbekiston Respublikasi oliy va o'rta maxsus ta'lim vaziri tomonidan tasdiqlangan quyidagi guvohnomalardan biri beriladi:

"O'zbekiston Respublikasi Prezidentining davlat stipendiyasi sohibi";

"Beruniy nomli davlat stipendiyasining sohibi";

"Ibn Sino nomli davlat stipendiyasining sohibi";

"Navoiy nomli davlat stipendiyasining sohibi";

"Ulug'bek nomli davlat stipendiyasining sohibi";

"Imom al-Buxoriy nomli davlat stipendiyasining sohibi";

"Islom Karimov nomli davlat stipendiyasining sohibi";

"To'lepbergen Qaipbergenov nomli davlat stipendiyasining sohibi";

"Ibroyim Yusupov nomli davlat stipendiyasining sohibi".

Guvohnomalar talabalarining o'qish joyida tantanali vaziyatda topshiriladi.

14. O'zbekiston Respublikasi Prezidenti davlat stipendiyasi sohibi bo'lgan talabalar bakalavriatni tugatgandan so'ng ikki yil mobaynida, nomli davlat stipendiyalari sohibi bo'lgan talabalar bakalavriatni tugatganidan so'ng bir yil mobaynida tegishli mutaxassislik bo'yicha magistraturaga kirish imtihonlarisiz qo'shimcha davlat granti asosida o'qishga qabul qilinadilar.

4-bob. Yakunlovchi qoidalar

15. Talabalarni kundalik darslarni o‘zlashtirmaganlik, o‘quv intizomini va odob-axloqni buzganlik uchun o‘quv yili mobaynida davlat stipendiyalaridan mahrum qilish oliy ta‘lim muassasalari taqdimnomalariga binoan tegishli vazirliklar va idoralar buyruqlari bilan amalga oshirilishi mumkin.

16. Talabalarning O‘zbekiston Respublikasi Prezidenti va nomli davlat stipendiyalariga tayinlash bo‘yicha ariza va shikoyatlari qonunchilik hujjatlarida belgilangan tartibda ko‘rib chiqiladi.

17. Mazkur Nizom talablarining buzilishida aybdor bo‘lgan shaxslar qonunchilikka muvofiq javob beradilar”.

2. Vazirlar Mahkamasining “Oliy ta‘lim muassasalari talabalariga to‘lanadigan stipendiyalar miqdorlarini belgilash hamda stipendiyalar tayinlash va to‘lash tartibini takomillashtirish chora-tadbirlari to‘g‘risida” 2020-yil 31-yanvardagi 59-son qarorida (O‘zbekiston Respublikasi QT, 2020-y., 1-son, 21-modda):

a) 5-bandning **birinchi xatboshisi** quyidagi tahrirda bayon etilsin:

“5. O‘zbekiston Respublikasi Prezidentining davlat stipendiyasi hamda Beruniy, Ibn Sino, Navoiy, Ulug‘bek, Imom al-Buxoriy, To‘lepbergen Qaipbergenov, Ibroyim Yusupov va Islom Karimov nomli davlat stipendiyalarini oluvchi talabalarga stipendiyalar tayinlashda Vazirlar Mahkamasining “O‘zbekiston iqtidorli yoshlarini taqdirlash va moddiy rag‘batlantirish to‘g‘risida” 2008-yil 13-oktabrdagi 226-son qarori bilan belgilangan tartiblar saqlab qolinsin”;

b) 1-ilovaning 10-bandi **birinchi xatboshisi** quyidagi tahrirda bayon etilsin:

“10. O‘zbekiston Respublikasi Prezidentining davlat stipendiyasi hamda Beruniy, Ibn Sino, Navoiy, Ulug‘bek, Imom al-Buxoriy, To‘lepbergen Qaipbergenov, Ibroyim Yusupov va Islom Karimov nomli davlat stipendiyalarini oluvchi talabalarga stipendiyalar tayinlash Vazirlar Mahkamasining “O‘zbekiston iqtidorli yoshlarini taqdirlash va moddiy rag‘batlantirish to‘g‘risida” 2008-yil 13-oktabrdagi 226-son qarori bilan tasdiqlangan Magistratura bosqichi talabalari uchun O‘zbekiston Respublikasi Prezidentining davlat stipendiyalari va ularni tayinlash tartibi to‘g‘risidagi nizom hamda Bakalavriat bosqichi talabalari uchun O‘zbekiston Respublikasi Prezidenti va nomli davlat stipendiyalari hamda ularni tayinlash tartibi to‘g‘risidagi nizomda belgilangan tartiblar asosida amalga oshiriladi”;

v) 2-ilovaning “Stipendiya nomi va qo‘shimcha to‘lovlar” ustuni 2-pozitsiyasi quyidagi tahrirda bayon etilsin:

“Beruniy, Ibn Sino, Navoiy, Ulug‘bek, Imom al-Buxoriy, To‘lepbergen Qaipbergenov, Ibroyim Yusupov, Islom Karimov va Kamoliddin Behzod nomli davlat stipendiyalari”.

(Qonunchilik ma‘lumotlari milliy bazasi, 04.11.2021-y., 09/21/674/1029-son)